

## Жігіттер, ойын арзан, күлкі қымбат

ЖАРИЯЛАНДЫ  
20.01.2023

ТІРЕК СӨЗДЕР  
Абай, Абай Құнанбайұлы

СІЛТЕМЕ  
<https://bilimger.kz/129282/>

### Жігіттер, ойын арзан, күлкі қымбат

Жігіттер, ойын арзан, күлкі қымбат,  
Екі түрлі нәрсе ғой сыр мен сымбат.  
Арзан, жалған күлмейтін, шын күлерлік  
Ер табылса жарайды, қылса сұхбат.  
Кейбіреу тыңдар үйден шыққанынша,  
Кейбіреу қояр көңіл ұққанынша.  
Сөз мәнісін білерлік кейбіреу бар,  
Абайлар әрбір сөзді өз халынша.  
Шын көңілмен сүйсе екен, кімді сүйсе,  
Бір сөзімен тұрса екен, жанса-күйсе.  
Қырмызы, қызыл жібек бозбалалар,  
Оңғақ пұлдай былғайды, бір дым тисе.  
Керек іс бозбалаға — талаптылық,  
Әр түрлі өнер, мінез, жақсы қылық.  
Кейбір жігіт жүреді мақтан күйлеп,  
Сыртқа пысық келеді, сөзге сынық.  
Кемді күн қызық дәурен тату өткіз,  
Жетпесе, біріңдікін бірің жеткіз!

Күншілдіксіз тату бол шын көңілмен,  
Қиянатшыл болмақты естен кеткіз!  
Бір жерде бірге жүрсең басың қосып,  
Біріңнің бірің сөйле сөзің тосып.  
Біріңді бірің ғиззәт, құрмет етіс,  
Тұрғандай бейне қорқып, жаның шошып.  
Жолдастық, сұхбаттастық — бір үлкен іс,  
Оның қадірін жетесіз адам білмес.  
Сүйікті ер білген сырын сыртқа жаймас,  
Артыңнан бір ауыз сөз айтып күлмес.  
Күйлеме жігітпін деп үнемі ойнас,  
Салынсаң, салдуарлық қадір қоймас.  
Ер жігіт таңдап тауып, еппен жүрсін,  
Төбетке өлекшіннің бәрі бір бәс.  
Біреуді көркі бар деп жақсы көрме,  
Лапылдақ көрсе қызар нәпсіге ерме!  
Әйел жақсы болмайды көркіменен,  
Мінезіне көз жетпей, көңіл бөлме!  
Көп жүрмес жеңсікқойлық, әлі-ақ тозар,  
Жаңғырар жеңсікқұмар, жатқа қозар.  
Күнде көрген бір беттен көңіл қайтар,  
Қылт еткізбес қылықты тамыршы озар.  
Толқынын жүрегіңнің хаттай таныр,  
Бүлк еткізбес қалайша соқса тамыр.  
Жар көңіліне бір жанын пида қылып,  
Білместігің бар болса, қылар сабыр.  
Шу дегенде көрінер сұлу артық,

Көбі көпшіл көрінер ондай қаншық.  
Бетім барда бетіме кім шыдар деп,  
Кімі паңдау келеді, кімі — тантық.  
Ақыл керек, ес керек, мінез керек,  
Ер ұялар іс қылмас қатын зерек.  
Салақ, олақ, ойнасшы, керім-кербез,  
Жыртаң-тыртаң қызылдан шығады ерек.  
Қатының сені сүйсе, сен де оны сүй,  
Қоржаң суық келеді кей сасық ми.  
Ері ақылды, қатыны мінезді боп,  
Тату болса, риаз үстіндегі үй.  
Жоқ болса қатыныңның жат өсегі,  
Болмаса мінезінің еш кесегі.  
Майысқан, бейне гүлдей толықсыған,  
Кем емес алтын тақтан жар төсегі.  
Жасаулы деп, малды деп байдан алма,  
Кедей қызы арзан деп құмарланба.  
Ары бар, ақылы бар, ұяты бар,  
Ата-ананың қызынан ғапыл қалма.  
Үйіңе тату құрбың келсе кіріп,  
Сазданбасын, қабақпен имендіріп.  
Ері сүйген кісіні о да сүйіп,  
Қызмет қылсын көңілі таза жүріп.  
Құрбыңның тәуір болсын өз мінезі,  
Абройлы қалжыңмен келсін сөзі.  
Сен оған мойын бұрып сөз айтқанда,  
Қатыныңда болмасын оның көзі.

Кей құрбы бүгін тату, ертең бату,  
Тілеуі, жақындығы — бәрі сату.  
Көкірегінде қаяу жоқ, қиянат жоқ,  
Қажымас, қайта айнымас қайран тату!  
Пайда деп, мал деп туар ендігі жас,  
Еңбекпен терін сатып түзден жимас.  
Меліш сауда сықылды күлкі сатып,  
Алса қоймас, араны тағы тоймас.  
Асық ұтыс секілді алыс-беріс —  
Тірі жанның қылғаны бүгін тегіс.  
Бірі көйтке таласып, бірі арам қып,  
Төбелескен, дауласқан жанжал-керіс.  
Жас бала әуел тату бола қалар,  
Ата-анадан жақын боп, ертіп алар,  
Бірін бірі құшақтап, шуылдасып,  
Ойын тарқар кезінде ұрыс салар.  
Біреуі жылап барса үйге таман,  
Ата-анасы бұрқылдар онан жаман.  
Татулығы құрысын ойыны мен,  
Дәл соларға ұқсайды мына заман.  
Жаман тату қазады өзіңе ор,  
Оған сенсең, бір күні боларсың қор.  
Ары бар, ұяты бар үлкенге сен,  
Өзі зордың болады иығы да зор.  
Қазақтың қайсысының бар санасы?  
Қылт етерде дап-дайын бір жаласы.  
Пысықтықтың белгісі — арыз беру,

Жоқ тұрса бес бересі, алты аласы.

Абай Құнанбаев

**ҚМ АА** Күәлік нөмірі: **KZ45VPY00102718** — ҚР Мәдениет және Ақпарат министрлігі

© 2026 **Bilimger.kz** Ақпараттық-танымдық білім порталы. Барлық мазмұн авторлық құқықпен қорғалған.